

四庫全書

史部

欽定四庫全書

欽定盛京通志卷四

聖製

四

聖祖仁皇帝御製文

詔

勅諭

欽定四庫全書

欽定盛京通志卷四

聖製四

聖祖仁皇帝御製文

詔

謁

福陵

昭陵詔
康熙十年

奉

天承運

皇帝詔曰朕惟自古帝王誕膺

天命撫育萬方皆由祖功宗德締造維艱俾後人克享成
業所以天下一統之後必展告成之禮甚鉅典也我

太祖高皇帝創建鴻圖肇興景運

太宗文皇帝布昭功德式廓丕基至

世祖章皇帝統一寰區大勲既集即欲躬詣

山陵展祭告成未遑修舉朕纘承隆緒上託

祖宗洪庥天下底定仰體

皇考未竟之志恭謁

福陵

昭陵虔修祀事以告成功禮竣旋京湛恩宣布於戲繼述
無疆永著顯承之盛昇平胥慶益彰樂利之休布告天
下咸使聞知

勅諭

諭禮部

康熙九年

太祖高皇帝創建鴻圖肇興景運

太宗文皇帝丕基式廓大業克宏迨

世祖章皇帝誕昭功德統一寰區即欲躬詣

太祖

太宗山陵以天下一統致告用展孝思因盜賊未靖師旅

繁興暫停往謁朕以眇躬續承鴻緒上託

祖

宗隆庥天下底定盜賊戢寧兵戈偃息每念

皇考未竟之志朝夕寢食不遑寧處本欲先詣

太祖

太宗山陵再詣

世祖山陵因奉

太皇太后慈命以

世祖升遐十年未得一詣

陵寢於今年八月前往朕是以恭侍

太皇太后先詣

孝陵展謁禮成言還今欲仰體

皇考前志躬詣

太祖

太宗山陵以告成功展朕孝思著議政王貝勒大臣內閣

九卿科道各官會議具奏爾部即遵諭行

諭禮部

康熙十年

朕前欲仰體

世祖章皇帝遺志躬詣

太祖

太宗山陵展祭以告成功前命議政王貝勒大臣等會議
議政王等以去年各處多有水旱之災且為時甚迫應
用之物預備難及具題暫行停止今思

太祖

太宗創業垂統功德隆盛

山陵在望刻不能忘去年恭謁

孝陵禮成今已數月若再久延時日孝思莫殫朕懷靡寧
茲當海內無事欲乘此時恭謁

福陵

昭陵以告成功用展孝思事關大典著議政王貝勒大臣
內閣九卿科道各官會議具奏爾部即遵諭行

諭禮部

康熙十年

朕仰體

世祖章皇帝遺志欲躬詣

太祖

太宗山陵展祭以告成功前命議政王貝勒大臣九卿科道等會議以各處多有災傷暫行停止今奉

太皇太后旨謂朕躬謁

山陵展祭告成關係大典即宜舉行以盡孝思朕仰遵

慈命擬躬行謁

陵禮應行事宜及需用各項著各該衙門速行備辦爾部

即遵諭行

諭隨侍諸臣

康熙十年

朕展謁

山陵惓惓在念今得至發祥重地拜謁

陵寢用展孝思祭禮已成朕懷大慰

是歲九月辛未

聖祖駕幸

盛京謁

陵成禮文武各官宴齊有差召八十以上耆民賜飲奉情

歡洽罔有是

諭

諭守

陵總管副總管等

康熙十年

爾等職司祀典凡一應祭品必親加虔視務盡誠敬副朕孝思

諭戶部刑部

康熙十年

奉天係

祖宗發祥重地奉天府寧古塔等處除十惡死罪不赦外凡已結未結死罪俱著減等其軍流徒杖等罪俱著寬

釋自山海關至奉天府所屬地方康熙十年十一年分
正項錢糧俱著豁免

諭內大臣覺羅武穆納等

康熙十六年

長白山乃

祖宗發祥之地今無確知之人爾等前赴鎮守吉林將軍
處選熟識路徑者導往詳視明白以便酌行祀禮爾等
可於大暑前馳驛速去

諭禮部

康熙十六年

長白山發祥重地奇蹟甚多山靈宜加封號永著祀典
以昭國家茂膺神貺之意該部會同內閣詳議以聞

時覺羅武穆納等自長白山還京復

命同有是

諭

諭奉天將軍安珠瑚 康熙二十年

今雲南等處俱已底定海宇清平告祭

天地

太廟

社稷畢即於

陵寢行告祭禮盛京者

祖宗開創根本重地朕時思念不忘今值天下宴安意欲躬詣

山陵告祭前幸盛京時未至

永陵致奠迄今尚歎於懷茲若果往當身歷其處仰瞻

祖宗發祥舊址爾可密遣副都統穆泰暨賢能官員將所行塗程與駐蹕及應行之處自興京通吉林徑路詳看

繪圖於同往章京內擇通曉者一員來奏恐踏看未周不能詳記道里山川也因無定期未行明示若俟定後商酌恐不及矣故爾密諭將軍身體佳否

諭吉林將軍巴海等

康熙二十一年

今以雲南等處底定躬詣盛京告祭

三陵意欲於扈從人等餽養馬匹之暇觀看吉林地方將軍應從何處帶領兵丁候迎可與盛京將軍定議行之再產鰾鯉等魚之處爾即詢明吉林錫特庫會同將需

用諸物悉加備辦完整為此特諭

諭禮部

康熙二十一年

比年以來逆賊吳三桂背恩反叛擾亂地方仰荷

祖宗在天之靈默垂庇佑克奏蕩平應躬詣

山陵展祭以告成功前初開捷音即謁

孝陵行禮茲奉

太皇太后慈諭

太祖

金史四十八卷
卷四
太宗山陵亦應親往祭告隨命議政王貝勒大臣等會議
僉謂事關大典允宜舉行今擬即謁

太祖

太宗山陵虔申昭告用展孝思應行事宜及需用各項著
各該衙門速行備辦爾部即遵諭行

諭奉天將軍安珠瑚

康熙二十一年

詳覽爾奏所言雖是但令雲南蕩平告成功之大典不
便延遲中止朕與廷臣公同酌議於二月十五日啟行

已有定期此外別旨俱口諭齋奏官員矣

諭裕親王福全

康熙二十一年

相別以來忽復兼旬棹筭之思時在寤寐初四日已抵
盛京山川形勢風土民情深維

祖宗開創之艱難令人遠想慨然春風漸佳知意興甚適
也特此佈聞不宣

諭蘇大敦柱

康熙二十一年

茲上

太皇太后奏啓為切陳微衷仰祈

睿鑒事內云自山海關至盛京水土皆佳獸多魚鮮每當
食頃輒念不能馳奉

太皇太后甚歎於懷到盛京後身親網獲鯉魚鯽魚設法
成段浸以羊脂者一種鹽醃者一種星馳遞送心期兩
件奉到之日倘得味仍鮮美庶可稍見微誠山中野燒
自落榛實及山核桃朝鮮所進柿餅松子白果栗子附
候

安奏啓同往等語所進之物同奏啓一併送至

慈寧宮其銀瓶中所貯之魚到日鮮否明白奏知若

太皇太后欲寄製成棗脯即實之瓶中封固付來為此特
諭

諭戶刑二部

康熙二十一年

朕奉

祖宗丕緒撫御區宇日以子育元元為念自逆賊吳三桂
倡亂滇南多方煽動軍興八載中外騷擾仰賴

祖宗在天之靈默垂眷佑殄滅兇渠民生乂安疆圉底定
爰特行編祀

山陵之禮用告成功茲恭詣

福陵

昭陵謁祭禮竣惟盛京為國家肇基重地朕躬親幸宜大
沛澤以示殊恩山海關以外及寧古塔等處地方官吏
軍民人等除十惡等真正死罪不赦外其餘已結未結
一切死罪俱著減等發落軍流徒杖等犯悉准赦免奉

天錦州二府屬康熙二十一年地丁正項錢糧著通行蠲免其官役墊補包賠等項應追銀兩察果家產盡絕亦并豁免用稱朕加惠根本優恤黎民至意

諭敦柱蘇大

康熙二十一年

朕至渾河太子河遼河三河合流之處地名牛莊河水泛漲乘舟渡河扈從諸人以次待渡因暇舉網所得鱖魚五尾島子魚六尾鯉魚四尾鱗魚四尾鰻魚三十二尾鴨嘴魚六尾重脣魚二尾中魚三尾杆條魚一尾共

六十三尾欲遣人齎往恐日久變味故著驛遞馳送爾
二人將魚進

太皇太后魚奏明此意有何

慈諭並此魚到日新鮮與否於隨常奏啟內詳細奏來為
此特諭

諭

刑部

康熙二十一年

頃以逆寇殲滅海宇蕩平朕躬詣盛京展謁

永陵

福陵

昭陵以告成功因而巡行邊塞咨詢民間疾苦東至吉林
地方見其風氣嚴寒由內地發遣安插人犯水土不習
難以資生念此輩雖干憲典但既經免死原欲令其生
全若仍投畀窮荒終歸踣斃殊非法外寬宥之初念朕
心深為不忍以後免死減等人犯俱著發往尚陽堡安
插其應發尚陽堡人犯改發遼陽安插至於反叛案內
應流人犯仍發吉林地方令其當差不必與新披甲之

人爲奴以昭朕軫恤民隱哀矜保全之意爾部卽遵諭行

諭裕親王福全

康熙二十一年

頃覽來奏具悉念朕之懷茲者告祭事畢巡行疆土兼講春蒐正當草淺獸肥弓燥手柔之時且地多豺虎麋鹿此樂惜不與王共之也近狀想佳特此諮詢

諭裕親王福全

康熙二十一年

別來未幾麥氣迎秋荏苒流光良增思念每閱來疏足

慰朕懷茲東巡典禮事事已畢經過之處無不喜見昇
平二十日自盛京回鑾會面可期佈問不宣

諭大學士等

康熙二十一年

流徙寧古塔吉林人犯朕向來未悉其苦今謁

陵至彼目擊方知此輩既無房屋棲身又無資力耕種復
重困於差役况南人脆弱來此苦寒之地風氣凜冽必
至顛踣溝壑遠離鄉土音信不通殊可憫惻雖若輩罪
由自作然發遠陽諸處安置亦足以蔽其辜矣彼地尚

金史紀事本末卷之四十一
有田土可以資生室廬可以安處且此等罪人雖在吉
林等處亦無用也

諭戶兵工三部

康熙二十一年

從前盛京看守

陵寢及山海關等城守章京員缺俱令其子弟頂補後停
止此例悉由京師補授頃朕以昭告成功展謁

永陵

福陵

昭陵因周視所歷地方見道路遼遠往返艱難若章京員缺盡從京師補授則家口遷移重為貧窶者之累且將前任章京房屋田地掣給新補之員以致前官孤孀無倚不能回京如即欲留彼地則田廬既空資生何策困苦日甚深用惻然嗣後盛京看守

陵寢及山海關等處城守章京員缺不必自京補授著於伊等子弟內令該將軍選擇賢能者具題引見頂補以免其往返遷移之苦倘伊等子弟無人堪用別有補授

發往之員可另撥田房給與具前任章京田房仍行留
給不必掣出令其孤孀得所爾三部會同詳議具奏特
諭

諭大學士等

康熙二十一年

朕巡幸沿邊地方見設立界限處墳墓毀損枯骨暴露
者甚多朕心憫焉夫掩骼埋胔王政所重可令盛京將
軍徧察而瘞埋之

諭將軍巴海等

康熙二十一年

朕幸吉林地方訪詢民隱見兵丁役重差繁勞苦至極
此等情由回鑾之日將軍以下至於兵丁教諭大意已
有時旨朕自至京師復為思繹不將各種無益差徭顯
與革除兵丁人等終無裨益且不得需實惠矣即如鷹
鷂窩雖於三月尋覓四月內捕取最妨農事魚屬無益
況所得鷹鷂不諳呼飼難至京師徒勞人力應行停止
又自八月放鷹原欲令其調習以便齎送數年來並無
名鷹貢至京師而烏拉地方兵丁輒於冬寒之時尋覓

山雞人馬勞頓應行停止又圍以講武事必不可廢亦不可無時冬月行大圍臘底行年圍春夏則視馬之肥瘠酌量行圍令貧人採取禽獸皮肉須預先傳明日期以便遵行所獲禽獸均行分給其圍獵不整肅者照例懲治不可時加責罰苛求瑣屑遇有猛獸須小心防禦以人為重勿致誤有所傷又如打鰾鯉等魚既有專管錫特庫等烏拉兵丁應停差役其搬移新滿洲採取造房并船隻梳木等項及偵探巡邏等差俱係軍務乃駐

防官兵專責不可寬假應照常行此外偶爾差遣大臣
侍衛督看採取東珠砍伐木植尋覓鷹鷂不涉每歲定
例所行之事似無過勞此後將軍以下領催以上應念
兵丁遠居邊境無市貿易自冒嚴寒往採山木妻子汲
水操作倍極艱辛時加憐憫吉林烏拉田地米糧甚為
緊要農事有誤關係非細宜勸勉之使勤耕種朕軫念
滿洲人民生理欲遣人專往以驛遞疲弊故因筆帖式
來奏特諭知之

諭副都統郎談等

康熙二十一年

卷四

羅刹犯我黑龍江一帶侵擾虞人戕害居民昔發兵進討未獲剪除歷年已久近聞蔓延益甚過尼滿恒袞諸處至赫哲費雅喀虞人住所殺掠不已爾等此行除自京遣往叅領侍衛護軍外令畢勒克圖等五台吉率科爾沁兵百名寧古塔副都統薩布蘇等率烏拉寧古塔兵八十名至達瑚爾索倫一面遣人赴尼布楚諭以捕鹿之故一面詳視陸路近遠沿黑龍江行圍徑薄雅克

薩城下勘其居址形勢度羅剎斷不敢出戰若以食物
來餽其受而量答之萬一出戰姑勿交鋒但率衆引還
朕別有區畫爾等還時須詳視自黑龍江至額蘇哩舟
行水路及已至額蘇哩其路直通寧古塔者更擇隨行
之叅領侍衛同薩布蘇往視之

時康熙二十一年八月初俄羅斯所屬羅剎劫掠邊境至是日漸擾累

聖祖遣郎談等往遼瑚爾索倫聲言捕鹿以覘其情將行諭之

諭議政王大臣等

康熙二十一年

據郎談等奏攻取羅剎甚易發兵三千足矣朕意亦以
為然第兵非善事宜暫停攻取調烏拉寧古塔兵一千
五百名並置造船艦發紅衣礮鳥鎗及演習之人於黑
龍江湖瑪爾二處建立木城與之對壘相機舉行所需
軍糧取諸科爾沁十旗及錫伯烏拉之官屯約可得一
萬二千石可支三年且我兵一至即行耕種不致匱乏
黑龍江城距索倫村不遠五宿可到其間設一驛俟我
兵將至淨溪里烏拉令索倫接濟牛羊甚有裨益如此

則羅刹不得納我遁逃而彼之遁逃者且絡繹來歸自不能久存矣其命寧古塔將軍巴海副都統薩布蘇統兵往駐黑龍江瑚瑪爾

諭寧古塔將軍殷圖

康熙二十二年

南方各省人人願往至寧古塔則不願者多朕以爾才能可用故簡任為將軍烏拉別無他事彼土之人惟好訐訟爾至當敷布教化俾識義理令俱改過遷善尤宜愛養兵丁令各得所我兵逼近羅刹須時加操練以修

武備已海暴戾貪污不惜士卒遂致失所其新滿洲皆
求主來歸理應撫綏慰勞施以教化俾安其生盛京副
都統佟寶是一堪用之人在烏拉將及一載彼處地方
情形必能洞悉爾到後暫留佟寶一二月奏明後方遣
回

諭大學士勒德洪明珠

康熙二十三年

爾等可傳諭議政王貝勒大臣征戰本非佳事不得已
而後用之向者俄羅斯無故侵擾我邊陲後復漸入越

大正四年

路乃俄羅斯仍居我邊界不歸我遁逃今雖應行勦滅但念用兵本非佳事我惟順天而行將大兵前臨雅克薩以朕諭旨遣人宣布俄羅斯諭之曰屢次令爾退回歸我遁逃之人遣使馳書者數年以來未有一次信息回報既不歸我遁逃反入我境內擾害地方搶掠人民妻子肆行不止為此遣發大兵前往堵截爾等所行之路於恒袁等處之俄羅斯許其歸順待以不死而生養之汝等仍不退離雅克薩地方故遣發大兵往行

征討我師威力豈難剿撲爾等若即破壞爾城郭殄滅
爾噍類自立成灰燼矣豈惟爾等俄羅斯普天之下率
土之人朕皆惻然仁愛咸欲令其靜寧無事各遂休養
故不忍將爾等遽行殄滅屢次曉諭爾等欲各安生業
共享太平則當即返雅庫地方以雅庫為界於彼處捕
取貂皮於彼土收其物產勿入我邊界恣意妄行汝能
將已納之遁逃歸還我則降我之俄羅斯亦發還於汝
如此則邊塞貿易可通咸安樂利而兵革偃息生民無

所擾害矣若執迷不悟罔遵諭旨仍行抗拒則大兵進剿摧破雅克薩之城且盡行誅戮矣可遣人前往明白開示俄羅斯果能遵旨即回以雅庫為界而我兵駐劄愛琿則於雅克薩地方安置哨兵令疆界寧謐倘仍行抗拒則大兵相機而行若不如此周詳區畫今雖取雅克薩我兵進則俄羅斯退我兵還則俄羅斯又進用兵無止息之日而民生亦不獲安矣應否如此議政王貝勒大臣會議具奏

諭議政王大臣等

康熙二十四年

疏內不請發禁旅良是但直隸各省綠旗兵未歷戰陣
且黑龍江火器甚多不須增用朕意選福建投誠善用
藤牌官兵現在八旗及安插山東山西河南者五百人
令臺灣投誠左都督何佑等率往薩布蘇一應咨題多
屬支吾借端延滯度四月進兵不過刈取田禾事必無
成此皆遣發黑龍江狂悖之人從中沮議不欲成事薩
布蘇出身微賤高視若輩無敢有違用兵所關甚鉅宜

周詳籌畫期於必克倘謀事草率復以明安達禮等退兵則羅剎將益肆披猖矣當自京城選賢能大臣一員統兵以行俟克取雅克薩之日班師又發盛京兵五百人代黑龍江兵守城種地出征兵還亦令還盛京種地一應事宜遣戶部大臣一員督理所云早熟之穀即內地春麥今我兵亦多種春麥及大麥油麥霜降前六日皆得收穫則不因師出而曠一年田功矣籐牌兵給馬二千匹帶往盛京盛京各佐領亦派馬二千匹照舊制

嚴督飼秣候京城馬到更代北行至瑪喇等所養馬皆
預備於齊齊哈爾屯此間催趙月杪可到聞此路間有
缺水處不免貽誤今自盛京抵烏拉自烏拉經新設驛
站路直且近當從此徑抵黑龍江沿途馬匹或有倒斃
瑪拉以所備者足數補送如此則我兵馬匹無虞矣簾
牌兵丁帶礮彈或十圓或二十圓以行其餉銀兵月給
二兩官月給三兩

敕

直隸山東山西河南巡撫令各屬派熟習火器兵共二

時康熙二十四年正月議政王大臣等請

百五十人並遣賢能官各四員預備火器送京
至日增發薩布蘇軍前協攻雅薩克城因有是

諭

復諭議政大臣等

康熙二十四年

兵非善事不得已而用之向者羅剎無故犯邊收我遁
逃後漸越界而來擾害索倫赫哲費雅喀奇勒爾諸地
不遑寧處剽劫人口搶擄村莊攘奪貂皮肆惡多端是
以屢遣人宣諭復移文來使羅剎竟不報命反深入赫
哲費雅喀一帶擾害益甚爰發兵黑龍江扼其來往之

路羅刹又竊據如故不送還遁逃應即剪滅今仰副
天心大兵逼臨雅克薩城姑再傳旨羅刹云前屢經遣人
移天命爾撤回人衆以遁逃歸我數年不報反深入內
地縱掠民間子女搆亂不休乃發兵截爾等路招撫恒
袞諸地羅刹赦而不誅因爾等仍不去雅克薩特遣勁
旅徂征以此兵威何難滅爾但率土之民朕無不惻然
垂憫欲其得所故不忍遽加殲除反覆告誡爾等欲相
安無事可速回雅庫於彼為界捕貂收賦毋復入內地

構亂歸我遁逃我亦歸爾逃來之羅剎果爾則界上得以貿易彼此寧居兵戈不興倘執迷不悟仍然拒命大兵必攻破雅克薩城殲除爾衆矣如此宣諭後羅剎果回雅庫為界即駐師於黑龍江設斥堠於雅克薩令疆圉帖然否則大兵酌量進止不如此宣諭今縱克取雅克薩城我進則彼退我退則彼進用兵無已邊民不安爾等其詳議以聞

諭議政王大臣等

康熙二十四年

黑龍江兵於是月起行五月中旬可至雅克薩城凡奏
報軍機自雅克薩至額蘇哩經黑龍江前來恐紆道遲
延令理藩院侍郎明愛於都爾伯特扎蘭特派兵五百
人並索倫兵酌自墨爾根至雅克薩設驛奏報軍機庶
免貽誤明愛往來覺察驛夫糧食匱乏以索倫所貯米
支給黑龍江以內每驛原設二十人應核減一半併入
蒙古若蒙古兵五百人過多再為核減索倫効力勤勞
傳諭異日加恩以示鼓勵

諭諸王大臣等

康熙二十四年

治國之道期於久安長治不可圖便一時當承平無事朕每殫心籌畫即今征羅刹之役似非甚要而所關甚鉅羅刹擾我黑龍江松花江一帶三十餘年其所竊據距我朝發祥之地甚近不速加剪除恐邊徼之民不獲寧息朕親政之後即留意於此細訪其土地形勝道路遠近及人物性情以故酌定天時地利運餉進兵機宜不拘衆見決意命將出師深入撓伐然兵貴相機而

動變化無窮惟恐諸將不遵朕指授致失機宜今收復雅克薩地得遂初心至於撫綏外國在使之心服不在震之以威近遣侍衛開保等往軍前諄諭之曰兵凶器戰危事古人不得已而用之朕以仁治天下素不嗜殺爾其嚴諭將士毋違朕旨以我兵馬精強器械堅利羅剎勢不能敵必獻地歸誠爾時勿殺一人俾還故土宣朕柔遠至意茲一一奉行朕甚嘉焉

復諭議政王大臣等

康熙二十四年

朕思凡事必周詳審度方獲實效不可輕率從事向者
尚書明安達禮輕進至糧餉不繼將軍沙爾瑚達巴海
等失計半途而歸遂致羅剎驕恣而索倫奇勒爾鄂羅
春等心懷疑貳朕詢其失機情形一一詳計今始奏功
兵法云多算勝少算不勝詎可忽視且兵貴神速前逆
賊吳三桂等叛朕思岳州係湖廣門戶遣人指示速戰
始克岳州遂一面進取四川以分賊勢一面密諭大將
軍賴塔從廣西趨雲南於是諸省底定兵革休息然亦

在將軍等奮勉効力耳倘怠忽不奉行雖有良策亦何益焉

諭大學士勒德洪學士麻爾圖圖納

康熙二十四年

俄羅斯入我邊塞擾害鄂羅春索倫赫哲費雅喀等處人民搶掠其家口雖屢肆兇暴朕不忍遽興兵革故未即遣發大兵征討數遣使曉諭俄羅斯恃其遼遠仍復抗拒益侵伐我邊鄙之人肆虐不止用是遣大兵直抵雅克薩之城彼因困迫已甚而後歸降爰遵朕命宥其

因而後降之罪釋之使還大兵迅速征行破四十年盤
踞之俄羅斯於數日之間獲雅克薩之城克奏厥績薩
布蘇向來逗遛不進兵之罪應概從寬免又雅齊納鄂
山本獲罪發遣之人其所互告之事仍行察議今進剿
官兵殊屬勞苦令伊等暫回吉林烏拉地方於盛京達
瑚爾之兵酌量派往防守至雅克薩城雖已克取防禦
決不可疎應於何地永駐官兵彈壓此時即當定議著
大學士勒德洪學士麻爾圖圖納同郎談關保與議政

王大臣等會議具奏

諭大學士勒德洪明珠等

康熙二十四年

黑龍江兵食所關最為重要必當謀恒足之道爾等與
議政王貝勒大臣會同詳議以聞又遣往黑龍江管轄
綠旗兵丁之官甚多兵少而管轄之官多甚無益也可
度量派官而兵更宜酌減以四百名為率亦既足用而
兵糧不致過費且近冬之際綠旗兵在彼地殊無所事
可由蒙古境每百名分為一隊俾遞送之既非久可至

而兵糧又不至糜費矣其一併詳議以聞

諭大學士勒德洪尚書科爾坤哈占等

康熙二十四年

科爾沁十旗今歲進貢牛羊乳酒酥油諸物皆毋貢至
京師悉送之黑龍江以給軍士籍其數奏聞仍以進貢
例賞賚之如此似於兵丁有益議政王貝勒大臣會議
以聞

諭大學士勒德洪學士麻爾圖

康熙二十五年

日者大兵往征俄羅斯破雅克薩城釋俄羅斯不誅赦

之使生還其時不並取尼布楚地者蓋以尼布楚地畫
為疆索使俄羅斯不得越尼布楚界外聽其捕牲也
今薩布蘇等奏言俄羅斯復來城雅克薩地今當即往
征而滅之耶抑或緩之以待黑龍江墨爾根地將士移
家定然後進兵為宜耶令議政王貝勒大臣及與俄羅
斯之役朋春佟保班達爾善郎談同爾等會議以聞

諭大學士勒德洪明珠等

康熙二十五年

錦州鳳凰城等地方人民稀少頗有曠土可令如墨爾

根黑龍江耕種之例為之其下所司

諭大學士勒德洪明珠等

康熙二十五年

日者遣部員自吉林烏拉至黑龍江以蒙古錫伯達瑚
哩索倫等人力耕種田穀大獲夫民食所關至重來歲
仍遣前種田官員以蒙古錫伯達瑚哩索倫等人力耕
種郎中博奇所監種田地較諸處收穫為多足供驛站
人役之口糧又積貯其餘穀博奇効力視衆為優其註
之冊此遣去諸員可互易其地監視耕種博奇又復大

獲則議敘焉

諭大學士勒德洪明珠

康熙二十六年

雅克薩地官兵中烏拉寧古塔兵可還至愛琿城盛京
兵可還至墨爾根地並令屯駐息馬過冬其事宜議政
王貝勒大臣會同詳議以聞

諭大學士勒德洪明珠

康熙二十六年

黑龍江官兵口糧關係至重屢次轉運米數并黑龍江
墨爾根地方接續所種米數宜加察明自盛京等處廣

運米石以為久遠裨益之計此皆當周詳區畫又發遣
彼處遊手無事之人甚多其口糧作何酌給耶前至黑
龍江一帶乃徑直通衢往來轉輸斷不致稍有阻滯如
蔡毓榮等巨富之人並殷實之家槩予口糧殊覺未當
彼處漢軍皆著察出披甲當差游手無事之人可分設
官莊廣開田畝以為恒產令戶兵二部賢能司官迅往
逐一察明到日確議具奏

諭尚書鄂爾圖郎中伊爾克圖溫保

康熙二十六年

黑龍江至為要地兵丁勞苦朕罔不知曩者俄羅斯占
踞達瑚哩索倫等處擾害邊疆幾四十餘年後備足軍
食永戍黑龍江以困逼之俄羅斯遂窘迫歸順苟糧儲
不足則如沙爾瑚達塔海等之往征而不能成功矣朕
所委曲區畫自盛京等處轉輸糧食及今所種米穀積
貯至裕彼地大臣官員皆不思樽節濫給於無用之人
苟且草率希圖軍儲罄盡勢必將彼等撤回在我之官
兵撤回俄羅斯大衆亦難以齊來然或一二人或十餘

人陸續聚集于黑龍江松花江之間構造木城盤踞其地則我取之維艱是俄羅斯為主兵而我反為客兵也今我惟多貯糧食永戍官兵則我兵以逸代勞矣如此則俄羅斯頻瑣來犯斷乎不能欲大隊侵入則彼糧食何能晚運耶若黑龍江不將我兵永戍自松花江黑龍江以外所居民人難以安居爾等皆係選擇差遣須殫心竭慮務期為久遠充裕之計詳加籌議惟此一舉也亦無事再遣矣

諭奉天府尹王國安

康熙二十八年

奉天為根本重地今聞游民甚多務農者少一遇旱潦即難補救今年亢旱朕遣賽弼漢往奉天諸處將糜費米糧如蒸酒等項悉行禁止爾至彼當勸民務農嚴察光棍游手之徒奉天田土旗民疆界早已丈量明白以旗下餘地付之莊頭俟滿洲蕃衍之時漸次給與耕種近金世鑑奏請將旗下餘地俱與百姓耕種徵收錢糧此地畝縱給百姓所徵錢糧亦復有限所見何淺陋也

金史卷八十二
今已另遣官前往丈量雖係彼處戶部之事爾在地方亦須公同詳察永定則例毋忽

諭戶部

康熙二十八年

盛京地方今年亢旱米糧不收聞兵丁現在買米而食朕心深切軫念其令戶部侍郎阿山乘驛速往與盛京各部大臣公同察明量其度歲所需令內務府官往取莊上所有之米散給俾得均沾實惠

時康熙二十八年十月辛巳戶部議覆
盛京遼陽等處屯莊所種田地因亢旱及霜閏米穀

諭

不收應免其納租移咨
盛京戶部詳計所需米數採買賑濟因有是

諭戶部

康熙二十九年

盛京兵丁全恃南畝耕獲及月給糧餉以為資生之計
昨歲盛京禾稼不登貧困兵丁艱於粒食曾以所有屯
糧頒發賑救頃值軍興遣一等侍衛齊蘭布往調盛京
兵丁隨發諭旨令無馬匹者給以官廠馬匹無行糧者
給以莊屯糧米官兵踴躍遄征倉卒之際置辦一切軍

裝遂支領明年二月分應給俸餉又預支五個月錢糧
刻期進發比厄魯特噶爾丹敗遁盛京官兵雖未經接
戰而奮勇敢愾深可嘉悅今若將預支俸餉復行抵扣
則窮乏兵丁必致生計艱窘朕心殊切憫惻所預給明
年二月分應支俸餉及增給五個月錢糧著免抵扣仍
照常支給俸餉以示朕愛養將士軫恤疾苦至意爾部
即遵諭行

諭內閣

康熙二十九年

邊外捕賊被殺者卹與身價被創者以受傷銀兩給之
守關口之章京守備把總等官及軍士皆勉効勞勩亦
賞賚之可諭兵部

諭大學士伊桑阿阿蘭泰

康熙二十九年

盛京軍士皆能挽強但其地雖有筋與弦向無牛角所
以軍士難得良弓盛京既有筋弦及工匠而戶部庫內
現貯牛角今年即發角二千對運至將軍公署將軍等
可監視造弓散給軍士明年為始每年以角一千對發

往盛京將軍可也

諭

內閣

康熙三十年

黑龍江軍士及船戶人役以每歲耕稼穀尚不支奏請
若以此為例每歲給發而所貯之穀有限遇需用米石
時必致匱乏遣戶部賢能司官一員會同黑龍江將軍
副都統應作何核減給與詳議奏聞

諭大學士伊桑阿阿蘭泰學士邁圖錫安南塔海傅繼

祖
康熙三十年

盛京官屯五十所沿邊丁壯設為屯二十五所遷移於
烏拉念此莊屯及沿邊丁壯居住年久已成聚落今遽
令遷移如此衆多人戶生業蕩然必致苦累仍留於盛
京與遷移於烏拉皆公家之屯其為納賦則一也朕意
此莊屯應停其遷移於烏拉兵丁每歲派三百名耕種
或一歲以烏拉之兵一歲以捕牲之人輪年耕種亦可
以積穀矣此事所關甚重著學士麻爾圖馳驛往盛京
烏拉令將軍副都統各部堂官悉喻朕意伊等之意若

何詳議回奏

諭大學士伊桑阿阿蘭泰學士邁圖錫安博極傅繼祖王

國昌年遐齡

康熙三十年

黑龍江松花江接壤之地彼處附近所居根奇勒諸姓
中原有可披甲之人應酌量令其披甲駐防遣滿洲兵
八十人往彼教訓之齊齊哈爾地方以索倫達瑚哩之
衆酌量令其披甲駐防遣滿洲兵二百人往彼教訓之
伊等居址附近亦心樂披甲如此則既無遠徙之苦亦

不致需用糗糧矣可以此詢問都統巴海令理藩院集議政諸臣會議以聞

諭尚書庫勒納

康熙三十一年

黑龍江極東北之地日出日入皆近東北方所以黑龍江夜短日落亦不甚暗

諭大學士伊桑阿阿蘭泰等

康熙三十一年

將軍薩布蘇佟寶等奏請驛站缺丁依數項補無妻室者給以婦人驛遞再為增置壯丁馬畜錢糧俱行添設

則驛站可不致因敝朕思驛站因敝者皆該將軍等不
省徭役不簡事件絕其要務槩令馳驛勒索之所致也
雖添置驛丁增給錢糧事若不務簡省究復何益且所
需婦人為數多矣取給一時將焉可得伊等在彼其可
得緣由或有成算耶可勅該將軍薩布蘇佟寶等如何
減省徭役不致凋敝驛遞所缺男婦從何充補會同盛
京將軍確議報部

諭戶部

康熙三十二年

今歲盛京穀石失收糧價甚貴來年春夏恐糧價更貴
必致窘迫亦未可定運糧之處亦著預議自盛京錦州
乘海船往山東水路甚近今歲山東地方年成豐熟俟
來年水解著盛京戶部侍郎親身由海前往山東會同
山東巡撫將附近地方米石多多發出由海運至三空
河賑膏與無糧之人

諭戶部

康熙三十三年

盛京等處去歲禾稼不登粒食維艱聞今年收穫亦未

豐稔米穀仍貴倘價值日漸翔湧則兵民生計恐致匱乏盛京等處地方關係緊要朕心時切軫念宜豫加籌畫作何恩給俾各資生著遣部院堂上官一員前往自甲兵以及匠役當差人等有力不能餬口者將人戶數目察明造冊具奏爾部即遵諭行

諭內閣

康熙三十三年

黑龍江墨爾根博爾多之地官員兵丁與索倫達瑚哩之人助其耕種亦有年矣若仍前相助力作其官員兵

丁及索倫達瑚哩之人皆致勞苦此數年來所種之穀
倘足以備用則集衆力以耕作可以停止著將軍薩布
蘇詳議具奏遣筆帖式一人往

諭內閣

康熙三十三年

盛京輓運原有船百艘乃實有用之具也存留預備凡
遇緩急為益良多盛京工部無故奏而廢棄之今年從
山東天津所運之米因乏轉運之船遂致遲悞盛京工
部堂司官著該部嚴訊議罪具奏

諭大學士伊桑阿侍郎珠都納副都統齊蘭布學士嵩祝

戶部郎中鄂奇等

康熙三十四年

副都統齊蘭布等自盛京還奏言今歲盛京亢旱麥禾
不登米價翔貴雖市有鬻粟而窮民力不能糴遂致重
困盛京者根本之地可令珠都納嵩祝鄂奇等馳驛迅
往會同盛京將軍副都統諸臣詳察窮乏者於去歲海
運米二萬石中動支一萬石計會散給今可食至秋成
此一萬石散給而有餘者平價發糶兵民均有裨益又

諸地有告糧乏者遣城守尉部員之賢能者併散給以賑之如二萬石不足散給發糶其速以聞

諭

戶部

康熙三十四年

盛京地方比歲荒歉粒食艱難朕心深切軫念本欲巡行省問疾苦情形徧敷恩澤今雖停止東行而所在貧窶兵丁尚望臨幸是宜仍加賑恤用裨資生應作何加恩爾部議奏又盛京兵丁錢糧兩季支領未支領前兵丁每致稱貸嗣後按月支給今歲秋禾聞不甚豐茂恐

生計漸難自今冬以至來秋應作何賑給不致失所共計需糧若干著盛京將軍副都統會同盛京戶部侍郎察明詳畫具奏

諭大學士伊桑阿阿蘭泰

康熙三十四年

雅克薩諸地夙產佳貂比年羅捕殆已至稀之若以貂不及格之故遂復治罪則官員徒爾受過佳貂實無可得自茲以往額數既足以不及格之故免其處分其令戶部理藩院內務府會同移文黑龍江將軍薩布蘇仍

令其定議具奏

諭內閣

康熙三十四年

盛京將軍等疏請給米但言兵丁而已其

陵上執事人等及衆百姓並不言及此皆朕赤子爾等亦可會同將軍查明一并散給若使海運之米明年可到盛京兵民方可無慮

諭大學士等

康熙三十四年

此奏甚屬疎忽馬甲之中亦有人口少者步甲之中亦

有人口多者一例按甲支給可乎來年海道運米未可預必其全到即盛京田穀亦難預必其全收凡事須曲盡籌畫豈可拘執定議此本發回令察明人口散給

時康熙三十四年九月丁丑盛京將軍公緯克托等疏言開原等處馬甲月給米二倉斛步甲月給米一倉斛今倉米不敷俟明年海運之米補給固有是

諭

諭大學士等

康熙三十四年

開原等處散給兵丁米穀若令行查必稽時日兵丁或

至重困著珠都納嵩祝前往將不能度日人口數目查明一面散給一面具題

諭

內閣 康熙三十五年

黑龍江吉林烏拉地方頻歲不登可移文盛京將軍令整繕船隻依前噶爾圖所運之例將盛京倉儲米穀以彼地人力運五千石至莫爾渾伊屯之地積貯之

諭大學士等

康熙三十五年

從天津海口運米但以新造船與商船轉運尚恐船少

應遣人往福建將軍督撫處勸諭走洋商船使來貿易
至時用以運米仍給以僱值其裝載貨物但收正稅
免雜費往取此船著各部院衙門派出賢能司官筆帖
式各一員令馳驛前去

時康熙三十五年二月內閣學士陶岱往
盛京賑濟奏請由天津海口運米至

盛京固有是

諭

諭戶部

康熙三十六年

朕前至寧夏黑龍江將軍薩布蘇曾奏伊處收貯糧米

三萬餘石年久漸朽與其積之腐爛何若散之為有益乎且出陳可濟軍糧易新便於收貯宜如所請行

時康熙三十六年九月乙巳黑龍江將軍薩布蘇疏言沿河被水之十八莊請計其人數將黑龍江所貯米糧散給固有是

諭

諭

內閣

康熙三十七年

烏拉寧古塔吉林黑龍江等處新滿洲內曾授官職以老病解任者照其原官品級給俸祿以養贍之矣此等解任之官令其子弟承替則供職得人而俸祿亦不致

虛糜其數兵部逐一詳察具奏

諭戶部

康熙三十七年

盛京係

列祖創業之地朕謁祭

陵寢咨詢民瘼承德等州縣今歲田禾未獲全登宜加恩
恤應徵米豆概行豁免爾部即移文該府尹徧示閭閻
家喻戶曉務俾均沾實惠以副朕愛民至意

諭內大臣等

康熙三十七年

開國佐運勲臣揚古利費英東額亦都三人効力甚可
嘉尚此三人墓朕祭

昭陵之日親臨奠酒其餘諸臣効力亦屬可嘉康熙三十
一年曾經祭奠者照前舉行顗親王薩哈璘瓦勤郡王
岳託等墓各遣大臣致祭

時康熙三十七年十月戊午

聖祖駐蹕

盛京因有是

諭

諭福善等

康熙三十七年

太祖

太宗開國定鼎爾祖輔佐勲勞爾等未必詳悉朕比年來
觀閱實錄知爾等之祖於開創時功績懋著深屬可嘉
朕既親來謁

陵必當臨爾祖墓奠酒爾等毋庸再奏

時楊古剌魯英東額亦都之子孫公福善等奏
言

聖駕欲親臨臣等之祖墓奠酒臣等不勝惶懼伏祈停止
聖祖乃有是

諭

諭大學士等

康熙三十八年

黑龍江地方連歲歉收著將烏拉收貯米糧運至墨爾根齊齊哈爾地方預備若彼處有引水種田之處著能耕種之人前去教導交該部議行

諭大學士等

康熙三十九年

俄羅斯地方遙遠僻處西北海隅然甚誠敬噶爾丹窘迫求救彼曾拒而不答曩者遣人分畫邊界即獻尼布楚地以東為界尼布楚等處原係布拉特烏梁海諸部

落之地彼皆林居以捕貂為業人稱為樹中人後俄羅斯強盛遂并吞之已五六十年矣遠服聲教割疆獻地出自忠誠即此允當軫念也

時俄羅斯差人奏進本章因有是

諭

諭吉林將軍揚福

康熙四十四年

此事不准行朕屢以太僕寺之厰馬並茶馬賞給京師兵丁及各處駐防兵丁所以兵丁無賠馬之苦歷觀宋明之時嘗議馬政皆無善策收馬無如口外者朕口外

厥馬今孳生已十萬牛有六萬羊至二十一萬若將如
許馬與牛羊驅至近畿收養即日費萬金亦不足也因
擇塞外水草肥美處收放是以毫不費餉而馬畜自然
孳息前巡行塞外見馬畜彌滿山谷歷行八日猶絡繹
不絕也

時康熙四十四年閏四月乙未楊福請以吉林
烏拉白都納等處動支庫銀買馬給兵丁牧養
因有是

諭

諭大學士等

康熙五十年

天上度數俱與地之寬大脗合以周時之尺算之天上一度即有地下二百五十里以今時之尺算之天上一度即有地下二百里自古以來繪輿圖者俱不照依天上之度數以推算地里之遠近故差悞者多朕前特遣能算善畫之人將東北一帶山川地里俱照天上度數推算詳加繪圖視之混同江自長白山後流出由船廠打牲烏拉向東北流會於黑龍江入海此皆係中國地方鴨綠江自長白山東南流出向西南而往由鳳凰城

朝鮮國義州兩間流入于海鴨綠江之西北係中國地方江之東南係朝鮮地方以江為界圖們江西長白山東邊流出向東南流入于海圖們江西南係朝鮮地方江之東北係中國地方亦以江為界此處俱已明白但鴨綠江圖們江二江之間地方知之不明即遣部員二人往鳳凰城會審朝鮮人李萬枝事又派出打牲烏拉總管穆克登同往伊等請訓旨時朕曾密諭云爾等此去并可查看地方同朝鮮官沿江而上如中國地方可

行即同朝鮮官在中國所屬地方行或中國所屬地方有阻隔不通處爾等俱在朝鮮所屬地方行乘此便至極盡處詳加閱視務將邊界查明來奏想伊等已由彼起程前往矣此番地方情形庶得明白

諭大學士等

康熙五十年

前差打牲烏拉總管穆克登等查看鳳凰城至長白山邊界伊等業將所查地方繪圖呈覽因路遠水大故未能至所指之地著於來春水解之時自義州乘小舟溯

流而上至不可行之處令其由陸路向圖們江查去但
道路遙遠萬一中途有阻令朝鮮人供應將此情由令
該部曉諭來朝正之朝鮮國官員書文給與帶付伊王
諭奉天府尹郝林

康熙五十三年

盛京旗民雜處命案甚多爾必親歷所屬地方誠心教
導毋謂此非久任之地將事諉與將軍各部國家設一
官即有一官之職為官者當立志盡職興起教化有一
番整頓方無忝厥職也

欽定盛京通志卷四

欽定四庫全書

史部

欽定盛京通志卷五

六

少詹事_臣曹城覆勘

總校官編修_臣朱鈐

欽定四庫全書

欽定盛京通志卷五

聖製五

聖祖仁皇帝御製詩文

碑頌

祭文

記

詩

欽定四庫全書

欽定盛京通志卷五

聖製

五

聖祖仁皇帝御製詩文

碑頌

福陵神功聖德碑文

惟

天眷祐下民綏靖方域篤生我

皇曾祖太祖高皇帝肇興東土奮師一旅式闢皇圖大武
布昭深仁洋溢用造我國家萬億年丕丕基駿德鴻功
於樂顯懿駕軼亘古予小子纂承洪緒既奉冊寶崇上
尊謚載緝徽猷炳垂方策惟

陵寢宜有功德之碑敬述大畧永勒貞珉叙曰

太祖承天廣運聖德神功肇紀立極仁孝睿武弘文定業
高皇帝姓愛新覺羅氏諱
先世發祥長白山之陽禎

符神貺歷著休徵至

皇始祖肇祖原皇帝式廓舊業寢熾寢昌又五傳至

顯祖宣皇帝世濟其勤流長積厚景運懋集神器攸歸誕
啟我

太祖高皇帝

顯祖之長子也

宣皇后娠十有三月乃生龍顏鳳目豐頤大耳天表玉立
舉止非常少不飲酒嬉戲稱為聰明貝勒及長騎射絕
倫雄畧蓋世用兵無敵而又至誠御物大度容人先是

有望氣者言滿洲將生聖人統一諸國至是滿洲長白山及東海呼倫諸部落爭相雄長癸未春蘓克素護河部圖倫城有尼堪外蘭者陰構明軍首逞大難於我時

太祖二十有五泣血誓師枕干問罪以遺甲十三副攻尼堪外蘭克圖倫城復攻之於嘉班誅諾密納鄂喀達取薩爾浒城時異已猜忌包藏禍心伺間竊發天威所攝罔弗獸驚鳥散遂俘兆嘉城長理岱取瑪爾敦平定棟鄂哲陳渾河等部丙戌秋擒斬尼堪外蘭於鄂勒歡城

戎首服辜先聲震疊環境諸國相繼削平既而葉赫哈達烏拉輝發科爾沁國錫伯卦勒察珠舍哩訥殷路九姓之國合兵三萬人分道來侵偵者夜告

太祖皇帝安寢達旦薦食濟師殲其渠首餘部皆潰斬級四千獲馬三千疋鎧甲千副羣方讐服乃增築城墉修飭法制創制國書開金銀鑛鐵冶所產蠙珠織皮通厥貿易財用殷阜肇立軍制師律精嚴國勢日盛丙午冬蒙古五部落尊

太祖為神武皇帝歲時朝貢絡繹相望而哈達輝發烏拉
數渝盟先後征討悉定其地每當軍行輒見五色雲亘
天祥光四塞立奏鉅功遠邇翕然益四旗為八設固山
梅勒甲喇牛錄額真遞相統轄命佐領下各出牛種屯
田積穀貯倉置理政聽訟大臣緩刑慎獄野無剽竊路
鮮拾遺國中大治帝業已成貝勒大臣集議勸進丙辰
之春正月恭上

尊號曰覆育列國英明皇帝建元天命時年五十有八越

二年定策征明明政久弛棄絕和好援我仇讐蕩搖我邊陲於是誓告有衆類

帝褫旗而行遂入撫順降臺堡五十所繼下清河明大舉稱兵會於瀋陽號四十七萬張左右翼左翼以杜松王宣趙孟麟張銓由渾河出撫順闖馬林麻岩潘宗顏由開河合葉赫兵出三岔口右翼以李如栢賀世賢闖鳴泰由清河出鴉鶻關劉綏康應乾合朝鮮兵出寬甸口向棟鄂四路來侵

太祖皇帝分精騎奮擊大破其衆五日而悉殲之城界藩
取開原破鐵嶺滅葉赫五年克遼陽瀋陽定議建都始
築東京尋取廣寧拔撫順十年遷都瀋陽由是東漸海
西迄遼南及朝鮮北暨嫩江烏龍江以至使犬諾壘諸
路罔不臣服

太祖皇帝神武天錫決幾制勝變化若神每戰輒單騎深
入裒創新馘神色不動善駕馭材雄推心置腹撫納降
附棄捐忿隙恒予擢用法所當坐雖親暱罔所私攻拔

城邑嚴禁軍士安輯居民是以羣策競奮率土思歸御
極以後拓地開疆日不暇給而躬勤於聽覽留神於載
籍修德納諫親賢遠奸建二木於門俾下情欲達者書
之以進尚寬大崇節儉睦宗親厚風俗重農桑賑窮乏
垂示典訓蕩平正直允為萬世法程猗歟盛哉天命十
一年八月庚戌崩

聖壽六十有八在位十有一年天聰三年二月己亥葬

福陵天柱山崇德元年四月上

尊謚承天廣運聖德神功肇紀立極仁孝武皇帝廟號

太祖康熙元年四月加上

今謚嗚呼有明德哀海宇板蕩之時生民顛隳之會我

太祖皇帝應運蹶生手提天戈披榛辟莽擲風沐雨掃邊

陬如破竹定遠左若建瓴戡亂求寧非富天下功極於

配

天道隆於昌後歷稽曩代創業垂統之君未有邁此締造

憂勤經綸宏遠者也瞻赫濯之如新撫承平之永賴謨

思光烈曷罄名言謹拜手稽首而作頌曰

天造大邦勃興東極長白山高苞符開闢鳳鳥生商履武

誕稷奕葉炳靈肇基王迹

太祖龍飛旋乾轉坤齊徽炎昊比烈義軒時惟草昧陟嶽

降原一成奮起雷動雲屯蠢爾仇方敢作牙孽赫斯一

怒恭行天罰寢甲枕鞍神勇迅發巨憝授首戎心式遏

奇謀倜儻遠畧深沉內構者挫外訌者擒單師十百摧

破強隣九邦潰靡四路掃塵攜貳則誅歸誠則撫義問

宣昭仁恩施普大畏小懷實揚我武來庭來王日闢疆
土疆土既闢歷數在躬膺圖受籙響應景從三才協軌
百靈潛通指揮盪滌振落發蒙覘敵烏集濟師冰泮夾
日貫月卿雲紉縵不義是征功成惟斷秉鉞稱干

帝心厭亂環山負海風靡雲披朱旗疾捲汗馬爭馳後我
思恫歌舞迎師紀元頌朔建策開基爰立軍營森羅鵠
鶴步伐止齊井牧相扞爰建國都屹峙屏翰扼吭拊背
皇居攸煥爰命分職勗哉臣鄰爰慎折獄恤哉祥刑爰

達民隱銘鐸重陳爰置國書科斗是新訏謨孔彰風規
渾噩禹誓湯征千秋繼作聲靈覃敷東西南朔大統乃
膺新命迺廓既詒既翼如鎬如豐九圍是式萬國來同
卜年卜世惟

太祖功巍巍蕩蕩昭恪

蒼穹右享郊壇敷時思繹炳耀圖書輝煌球壁景瞻

福陵神邱是若百川縈朝羣山拱掖蔥蘢王氣松楸鬱蒼
玉衣永鎮弓劍長藏億載顧慕春露秋霜樹茲穹碑錫

擬無疆

福陵頌

并序

惟

上帝鑒觀下民誕昇神聖俾立君極以開闢草昧垂統億祀非甚盛德曷克應天順人而締造鴻業焉我

太祖高皇帝聰明睿知本為性生英武勇畧迥不世出故能躬著戎衣手提尺劍而疆宇日拓丕受景命顯庸東國騰威區夏雖太王之居岐剪商文王之江漢歸化未

足方斯赫濯也予小子仰荷

列聖丕基統御萬國昭章式廓隆古圖籍所莫覲矣然上

跡

聖祖當日一成一旅擲風沐雨斬刈荆棘張彼撻伐順者
綏之逆者殄之統壹羣部建元正位國始立焉既乃鞠
旅徂征遐邇讐服悉臣悉氓遂定鼎遠土而王業愈光
顯矣於戲盛哉惟

天生

聖惟

聖奉

天我

太祖創業之艱如彼而垂統之遠如此豈非天寶授之而
克荷厥休者哉予小子景仰謨烈奚敢忘紹述焉爰作
頌曰於昭

太祖誕膺景命允文允武體協仁聖天罰恭行赫然割正
啟疆東海聿懷兆姓戰罔弗克威畧如神德罔弗冒桀

驚威臣受籙踐阼帝厯鼎新建官立制王路丕遵爰誓
六師濯征明國以少擊衆羣醜胥殛長驅鐵嶺墮彼扼
塞茫茫遼藩隸我版域會極歸極乃建皇都大統肇跡
炳垂帝謨在昔湯文蹶起一隅先聖後聖同軌合符皇
哉

龍興山川孔固

寢園崔嵬風雲盤互玉衣鐵甲百神衛護仰頌

先猷萬年錫祚

昭陵神功聖德碑文

天以神器畀我國家洪惟

皇祖太宗文皇帝智勇神聖光昭

太祖高皇帝丕緒帝紘皇綱是廓是恢榦不庭方構造鴻

業垂裕

皇考世祖章皇帝大一統之基貽億萬禩無疆之休維予

小子纘承

聖緒念

陵寢宜有功德之碑敬勒貞珉昭示無極叙曰

太宗應天興國弘德彰武寬溫仁聖睿孝隆道顯功文皇

帝諱

太祖承天廣運聖德神功肇紀立極仁孝睿武弘文定業

高皇帝第四子也

母孝慈昭憲敬順慶顯成天輔聖高皇后生而神靈徇齊

明敏龍行虎步顏如渥丹嚴寒不栗舉止非常

太祖皇帝特鍾愛焉既長英武豁達孝弟恭敬慈愛和順

秉心寬宏好觀書史一有聞見終身不忘沉機果斷羣
望攸屬天命十一年八月

太祖皇帝升遐諸貝勒大臣咸推我

皇祖才德冠世宜繼承帝業以九月朔嗣登大位建元天
聰時年三十五踐阼之後愛養人民撫綏中外崇儉務
本修政任賢仁聲義問無遠弗届除慝討貳用整六師
迺擊蒙古執一十四貝勒奏凱八纛下迺征朝鮮克義
州進拔漢山城入安州抵平壤朝鮮王李倬遁江華島

遺其弟覺來行成遂盡反所收地與盟而還迺征察哈爾翦多羅特部落編俘獲為氓迺伐明自遵化臨北京畧良鄉斬其將滿桂孫祖壽擒其將黑雲龍麻登雲還拔永平迺拔大凌河降其將士於是孔有德耿仲明等航海來歸迺征黑龍江瓦爾哈下之察哈爾舉國來附獲歷代帝王傳國之寶天聰九年冬羣臣勸進

尊號

皇祖辭讓再三明年四月表上

尊號曰寬溫仁聖皇帝建國號大清改元崇德告於

皇天后土追王

列祖上

太祖高皇帝

高皇后尊謚羣臣咸上表賀乃錫宴肆赦是年朝鮮毀盟
討之拔其都載飛舸於車凌江華島李倭自縛請為臣
釋之還并歸其俘獲朝鮮感服勒石南漢以銘勲德遂
帥水師渡海克皮島既而大出師遣將毀關入分左右

翼由涿州畧地至山西界復自寧清渡河破濟南克城
四十有九降者八與明兵五十七戰皆捷六年圍錦州
入其郭洪承疇以兵來援

皇祖陳師於松山杏山之間明兵號十三萬望見

皇祖張黃蓋往來指揮皆懼謀夜遁我師分道爭擊連大
破之擒承疇降祖大壽錦州松山杏山塔山悉下又命
將入關破兗州東抵寧海克城八十有八降者六陣敗
明兵者三十九於是天戈所指罔不率俾黃河之源青

海之濱使犬役鹿之國來賓恐後野駝奇獸黑狐紫貂
重譯來獻聲教之遠功烈之盛古未有也嗚呼惟我

皇祖克配天心誕膺景命聰明睿知神武不殺懷柔以德
變伐以威大勲用集大猷是程無有內外乃罔不即叙
親九族正百官修明典章誕敷政教隆郊丘廟祀之儀
定頒歷朝會之禮辨鹵簿旗章服御之制聲名文物炳
然宏備釋奠孔子以四子配立文館譯書史於翔鳳閣
俾儒臣記注得失開科目取士

諭臣下盡言無隱論功封兄弟子姪為諸王貝勒外藩蒙
古亦論功封爵有差優禮降臣寄以心膂賞罰詳明斷
獄平允綱舉目張仁至義盡至於審制度定律令斥邪
術禁喪祭踰禮者務農桑廣漁獵以豐民食皆可為萬
世法凡勤勞國事者賜予必優渥名近臣入宮日至再
三講論政事以賓禮遇之諸國新附之人入見必詢其
姓名世系慰勞如舊識

天語藹然以故雖至難馴者無不悅服如薩哈爾察卦勒

察瓦爾喀瑚爾哈諸國素不及禮亦貢獻稱臣其貝勒大臣至俱恩遇之如子弟故其部落降者相繼嘗念中原生民塗炭欲與民和好惟務修德不樂觀兵屢貽書明邊帥曰朕意在講和不忍無辜赤子懔懼鋒鏑明之君臣置若罔聞致煩

天討每出師必

諭諸將授以兵律嘗曰明之土地人民

天以與我是民即我民也故師行雖嚴寒不入屯堡士卒

死傷弔問不遺每戰勝攻取符瑞駢集必曰

上天眷佑惕然祇懼克敵告於

廟蓋敬

天尊

祖勤民若是其至

豐功厚澤與天地等有國史所不能盡書者矣以崇德八

年八月庚午崩

聖壽五十有二在位十有七年九月壬子葬

昭陵隆業山嗚呼八音遏密萬國感痛實惟

至德深仁為生民主以宏我國家之大寶命愾俊見聞陟
降庭止謹述盛概拜手稽首而系之以頌曰於赫

皇祖纘

太祖之緒誕敷乃文孔奮厥武整我師干拓我疆土東奠
朝鮮西讐蒙古貳則獲之服則釋之降則憐之賢則臣
之有言遜志則必遏之有言逆耳則必納之治分六曹
職統三院筆箐史臣書譯文館與神為謀以古為鑑制

禮明刑儀章是憲一人有慶肇域四方四方來王自天
降祥和鸞鏘鏘旗旒央央聿昭茂祉煇耀章光乾符效珍
坤儀開奧既協靈圖誕升顯號濟濟師師羣工舞蹈歷
數攸歸謳歌前導乃禋乃祀於

廟於

郊乃燕乃射於野於朝乃赦乃宥於狴於牢乃漁乃獵於
狩於苗乃命紫宮清寧正中麟趾在右闕雎在東崇政
篤恭翔鳳飛龍文德武功以綏萬邦松山之陰杏山之

金史卷五
下戰士連營崇墉百堵取彼元戎繫之以組肅將

天威救民水火屹屹榆關王旅所征而幽而并而冀而青
而充而徐克其百城涉河踰濟及于東溟時乘以乾帝
出乎震罔有遐邇民莫不信或獻其琛或輸其賁河源
海壖協靈效順有典有則貽萬子孫言為邱墳績婉農
軒佑我

皇考大啟幅員允

皇祖之德

皇祖之勲瞻仰

昭陵在盛京之北雲霞所棲松栢所植有穹者碑昭宣世
德第祿來崇時萬時億

昭陵頌

并序

國家垂厯服無疆之休類必有神聖開天肇興王業又
必有神聖繼體式廓鴻基故能經綸宇宙積功累仁保
世滋大我

太宗文皇帝挺濬哲之資蘊欽明之德紹膺寶位續前謨

而光顯之外奮威武內修文教百度具舉臣民胥悅於
是南征則墮巖關繞明都耀兵燕趙鞠旅齊魯投鞭渤
海飲馬黃河六師安行莫我敢遏東征則誅貳綏服朝
鮮納款列為屏藩西征則三十五部厥角歸命貢賁奉
朔益其允塞之猷桓撥之畧赫濯於覆載間矣乃若惇
九族惠元元郊圻以飭爵秩以班賞善宥過優禮勲舊
求賢之思若渴崇儒之化丕隆雖古帝德廣運曷以加
焉當是時義問炳耀仁風翔洽一統之規已裕矣猶畫

境息民俟天休命於戲皇哉盛哉昔殷祥長發而湯受
之周室本支百世而文啓之我

皇祖詎有遜美予小子嗣承丕緒撫安海寓以弘億萬禩
之業紹述

祖德敬揚

先烈乃作頌曰猗歟

皇祖克配彼

天光被四表仁浥八埏既受共球神人攸主至治洋洋弘

謨訐訐桓哉七萃捷彼南疆匪疾匪棘兆人是匡徂征
朝鮮爰渡鴨綠聲其携貳綏其臣屬西荒千帳慕義同
歸鐘鼓始振稽顙莫違至化覃敷函夏率育

天錫大寶景命有僕曰崇儒雅曰叙彝倫五章五用式廼
俊民法度孔昭典常聿正婉美唐虞惟后克聖建中錫
極貽我後昆皇皇大烈億祀彌尊肅望

山陵光華燁赫永言垂裕敬承靡斁

北鎮廟碑文

醫巫閭屹峙東北為幽州巨鎮昔虞帝封十有二山此其一也穹崇磅礴靈瑞所鍾實護王氣以壯鴻圖與嶽瀆諸神並垂祀典朕省方問俗嘗過其境望其佳氣鬱鬱葱葱上挿霄漢下瞰蓬瀛懸瀑飛流喬松盤蔚知其所以保障而凝休者蓋有素矣向錫匾額式展褒崇而廟貌未隆無以昭顯特勅修造遣專官以恪乃事凡所需給皆頒自內府始於康熙四十五年七月訖於本年十一月不四月而告厥成功焉規制宏備輪奐維新紺

字琳宮照耀山谷於時臣民瞻仰固不欣悅而府尹臣
奏請謂宜光大翰勒諸貞珉朕御極以來勤恤民隱祇
奉

天庥敬共神明罔敢稍斂維此鎮之奕奕為神京之翊輔
嘉符凝集靈爽式憑神其永贊雍熙益弘福祐錫蕃昌
於庶類固丕祚於萬年用慰朕精虔之至意爰樹穹碑
書重修歲月以示來茲

忠直公伊爾登碑

康熙六年

稽古建業驅策羣力不吝爵賞以待有功故生勤寵錫
歿與表揚干城心腹有傳不朽所以勵忠益甚備也爾
二等伯內大臣加一級伊爾登賦姿義勇制行忠直蚤
涖戎行才猷素著其征北京圍錦州等處或越衆先入
或設伏出奇以少勝衆屢敗敵兵克副任使優獎膚功
歷事累朝公忠允懋於其沒也朕深悼焉特賜謚曰忠
直勒諸貞珉光及衆壤國典臣誼庶其昭垂無斁哉

多羅勇壯貝勒穆爾哈齊碑

康熙十年

自古帝王承天撫世篤念宗親故生則賜以榮封歿則彰以令德典至渥也爾青巴圖魯穆爾哈齊係

宣皇帝之子秉性安詳居心愷悌已進封為多羅勇壯貝勒奄逝既久豐碑未樹朕念切本支復隆表著之恩爰稽成憲勒之貞珉用傳不朽庶昭朕敦族之心永為藩屏之懿典云爾

剛毅輔國公達爾察碑

康熙十年

自古帝王創業垂統以貽萬世凡屬宗支皆膺顯號以

重懿親也爾達爾察係謚勇壯青巴圖魯穆爾哈齊之
子性行純良才猷敏練已封為剛毅輔國公奄逝既久
豐碑未樹朕篤念宗親爰稽成憲勒之貞珉用垂不朽
庶昭朕敦睦之懷云爾

額親王薩哈璘碑

康熙十一年

自古帝王創業垂統必懋建本支以作藩屏故生隆顯
爵歿錫豐碑親親賢賢典甚重也爾薩哈璘貝勒負姿
忠亮中外所推膚功屢建甲冑躬擧努力行間職司邦

禮盡心典則益著寅清洵百代所當瞻仰者也擬封多
羅郡王忽然長逝

太宗文皇帝睦爾勲勞追封為和碩穎親王以示隆眷於
康熙二年特賜卹典敕建豐碑朕今追念爾前勲加謚
曰毅重勒貞珉用傳不朽以示敦睦懿親之意云爾

開國佐運動臣武勲王揚古利直義公費英東弘

毅公額亦都碑

康熙三十九年

朕惟國家創建丕基開無疆之景運既篤生

神聖英武之君以剪除亂逆啓闢疆宇勘定諸邦一統之
威肇於東土其時則有一德一心之佐殫忠戮力經營
四方以翊鴻猷而成大業蓋天寶挺生異才鍾山嶽之
靈挾風霆之氣真誠不貳勇毅無倫名高百戰之勲位超
五等之爵垂聲竹帛配食

廟庭以與國家共承休祉子孫世衍其澤是豈偶然者哉
當我

列祖之隆興也一時人材蔚起猛士如雲戰將如雨以藝

欽定四庫全書

聖訓

卷五

勇稱以功名顯者不可勝數而功冠諸臣為一代元勳
則有開國佐運忠勇王揚古利直義公費英東弘毅公
額亦都尤為傑出焉朕嘗恭覽

列祖實錄考三臣行事折衝行間則戰以勝攻必克平居
則矢忠直贊謀畫豐功偉績至今焜耀簡編未嘗不緬
想英風興懷往蹟昔人創造艱難枕戈擐甲櫛風沐雨
之勞恒流連徃復不能去於懷也歲在戊寅朕巡行舊
京展祀

陵寢追維

祖宗功德隆盛并及當時佐命之臣邱隴所在皆遣官致祭而於三臣之墓特親至奠醊以示優崇仍復專官祭享蓋功在社稷以死勤王古人原有明禋之典朕篤勲庸用申異數併為文勒諸貞石以昭示於無窮焉

欽定四庫全書

卷五

祭文

祭遼太祖文

康熙二十一年

自古帝王受

天顯命繼道統而新治統聖賢代起先後一揆成功盛德

炳如日星朕誕膺

眷祐臨制萬方掃滅兇殘廓清區宇告功古后殷禮肇稱
敬遣專官代將牲帛爰修禋祀之誠用展景行之志仰
企明靈尚其鑒享

祭長白山文

康熙三十五年

維

神天作鍾祥地靈啓運肇基王迹誕錫鴻休朕勤恤民
依永期殷阜邇年以來郡縣水旱間告年穀歉登蚤夜
孜孜深切軫念用是專官秩祀為民祈福冀雨暘之時
若庶稼穡之屢豐惟

神鑒焉

祭告北鎮醫巫閭山文

康熙四十二年

維

神功障遼陽勢連渤海靈威丕赫作鎮北方朕祇承
休命統馭寰區夙夜勤勞殫思上理歷茲四十餘載今者
適屆五旬海宇昇平民生樂業見輿情之愛戴沛下土
之恩膏特遣專官虔申秩祀尚憑靈貺益錫蕃禧佑我
國家共登仁壽

神其鑒焉

記

御製創興盛京海運記

康熙三十六年

傳曰補乏薦饑道也朕孜孜圖治冀臻上理一夫不獲
若納諸隍是以平時謹財用廣委積一遇凶荒則蠲租
已責之外開廩發賑設糜平糶靡政弗舉惟是東北地
勢曠莽陸輓維艱遼左暨朔漠諸郡尤屬險遠計惟航
海轉粟事半功倍規畫於中者非一日矣癸酉冬盛京
穀不登民艱於食乃發山東濱海郡縣常平倉米二萬

石由登州運至三岔河海運之役自茲始明年二月親幸天津訪海道自大沽口達三岔較便三月命部員董廠事截留山東漕米二萬石用商船三十連檣出津門海若効順三晝夜即抵三岔因建倉遼陽開化城諸處儲峙之又分舟運至盛京米價頓減饑困以蘇朕念盛京根本重地積貯多則民食永足乃於丙子春復截留山東漕米五萬石運至三岔河如故其秋諭截留次年漕米六萬石遣部臣偕督撫造新船二十加運二萬石

既又諭增造船十來歲可運至十二萬石猶慮運船少也明年春諭福建將軍督撫勸導商船泛海貿易至則給以運直所齎貨物止徵正稅一時商賈靡不踴躍趨事海舶大集於是截留河南山東漕米共二十萬石用天津浙閩船前後轉運以達盛京共數十萬有奇適烏拉告饑遂以所運粟分輸伊屯河士卒數萬咸賴生全而是時大兵方進剿逆寇噶爾丹需糧孔亟用以頒給軍需不匱其年冬盛京

陵寢各屬兵民及科爾沁諸屬國窮戶人等咸以疾苦聞
復發盛京存貯米賑之其所濟之遠如此因命來歲仍
自大沽故道用天津船運山東河南漕米六萬石以備
軍民之需而商船至是亦弗用矣是役也輓數十萬之
粟經數千里之遙帆檣一集倉庾俱滿無踰關度嶺之
勞絕車載牛牽之苦波委水輸禾囷自轉賑陪京而人
民胥樂給軍需而庚癸不呼內以撫綏藩部外以摧滅
強寇皆由肇舉海運一法斷自朕衷屢試而效故自侯

旬以至要荒均受其賜夫舉一事而有濟於一方者古人尚不敢忘況若茲之費省利大功神惠博使不載其始末垂示簡冊將良法美意久而漸失後何所考用是援筆而紀其實云

詩

聖祖仁皇帝東巡古今體詩

康熙二十一年

東巡二首

并序

八年征剿喜見承平緬想

祖宗功德禮宜躬謁

陵廟以告成功爰於二年十五日命駕東巡是日天氣晴
和微風動旆從者溢路觀者夾途顧瞻遠邇莫不歡躍
賦詩二首

昆池不習戰寰宇已銷兵鴻業承匪易膚功久乃成威
靈昭

祖德展謁慰羣情迢遞關山路寧辭千里行

其二

順動因時豫東風引翠旗鳴驚萬騎出執事百僚隨日
暖草初茁烟輕柳未絲春風無限好應有上

陵詩

山海關

并序

連山據海地固金湯明時倚為險要設重鎮以守之我
朝定鼎燕京垂四十年關門不閉既非設險還慚恃德
偶賦數言聊以紀事

重關稱第一扼險倚雄邊地勢長城接天空滄海連戍
歌終歲苦揮羽不時傳作鎮隆三輔征輸困百年笳寒
龍塞月甲冷雉樓烟歷數歸王極網維秉化權漫勞嚴
鎖鑰空自結山川在德誠非易臨風更慨然

蒙恬所築長城

萬里經營到海涯紛紛調發逐浮誇當時用盡生民力
天下何曾屬爾家

姜女祠

朝朝海上望夫還留得荒祠半仞山多少征人埋白骨
獨將大節說紅顏

曉過寧遠

孤城臨巨野舊烈憶西征破壘荆榛滿村雞向曉鳴

行殿夜覽奏章

飛遞傳來奏牘多旌門莫問夜如何銀燈毳幙春寒重
恐是陰陽尚失和

呂翁山是

聖祖太宗文皇帝擒洪承疇處

旌旗直捲陣雲沉濠塹遺踪尚可尋十萬健兒皆解甲
一時大帥此成擒民情効順當年事王業艱難
聖祖心遂使關西如破竹至今戰氣盡陰森

松山

鳴笳伐鼓速兵機
百勝謀成夜合圍
月黑風高神鬼泣
金戈白馬識天威

杏山晚眺

野日荒荒蔓草平
孤村雞犬寂無聲
山中獵罷殘陽晚
時見高原夜燒明

憇小凌河

河水流不息
晝夜去涓涓
昔為爭戰地
今是豫遊年
駐馬孤岑外
移舟古岸前
殘陽下新柳
約畧見春妍

錦州道上

野徑臨官驛炊烟出杳冥地連榆塞紫山列錦屏青城
郭知何處旌旄只暫停版圖歸大業烽火罷林垌

駐蹕大凌河

歸騎雲屯向晚過昇平笳吹動鏡譚光搖幕火繁星燦
影暗旗風野霧多兵氣已消沙石所軍聲猶壯大凌河
豐京老將還能說曾記前途自倒戈

途次逢寒食

何處來春風淡蕩開晴旭不見杏花紅纔逢柳梢綠

十三山

迤邐峯連大道間憑空青削十三山
敵樓人散堠臺廢終日茸茸草色閒

過廣寧望醫巫閭山

名山插霄漢朶朶青芙蓉連亘數十里
隱見千百重迢遙不可及黛色堆奇峯
窈窕復窄窄鬱鬱多蒼松中有桃花洞
杳靄常雲封萬古鎮幽州秩祀同岱宗
盼望生

引領瞻顧停六龍何時一登覽盭滌疏心胸

渡句驪河

野岸春蒸發青蔥一色齊皇興連近遠地軸別東西日
送霓旌影風催駿馬蹄山河綿帶礪回首重低迷

過永安橋口占

夾路飛塵宿雨消十年曾此駐龍鑣春風城闕知非遠
幾處輕寒變柳條

盛京遣使請

太皇太后

皇太后起居夜書奏疏畢偶成

雲山遙隔萬安宮
定省心懸午夜中
孺慕經時書不盡
微誠憑仗與東風

三月初六日告祭

福陵恭述十韻

瑞靄鍾靈闕
晴烟繞閤宮
萬山皆拱北
百水盡涵東
天矯盤峯秀
紆迴磴道通
俯看環衆象
遙睇極高崇
松栢

九九直岡巒面面同恢弘思

祖烈建樹本神功戰術無前畧謨謀啟後衷揮蛇曾握劍
定鼎有遺弓展禮威儀整申誠俎豆豐車書叨繼統貌
爾媿微躬

初八日告祭

昭陵恭述十二韻

盛德兼三代威名定四方文謨真顯赫武烈實飛揚包
并收羣國虛謙集衆長網羅來俊彥締造闢洪荒卜世

周垂厯開基漢啟疆靈山佳氣迥

寢廟瑞雲張曠遠臨平陸幽深逼上蒼汗膏趨石馬歌欲
奏芝房洱海銷兵戰炎陬絕叛狂功成昭默佑告祀肅
誠將微念通層構含情望兩廂千官遵大典進退盡鏘
鏘

盛京舊宮

雙懸鳳闕隱金鋪想見龍飛握瑞符殿列丹青崇大政
宮開紫極接神區君臣際會風雲日版籍留存山海圖

堂構有懷追往事土階儉樸示規模

告祀禮成宴諸臣於舊宮

闔闔門開玉座春金支徧插綺筵新鏗鏘劍珮千官集
曼衍魚龍百戲陳功定舞干歌靖亂恩留過沛樂同民
大風猛士何煩憶仗下班聯絳灌臣

三月十一日雪中詣

永陵告祭

峯巒疊疊水層層王氣氤氳護

永陵蟠伏諸山成虎踞飛騫衆壑佐龍騰雲封草木橋園
古雪擁松楸輦路升一自遷岐基盛業深思遺緒愧難
承

薩爾汗

并序

太祖高皇帝嘗駐師於此以五百人破明四路兵數十萬
衆殲杜松於鐵背山遂有遼東實

帝業之所由基也

城成龍躍聳重霄黃鉞麾時早定遼鐵背山

一名幹
理部謨

前

酣戰罷橫行萬里迅飛颼

春蒐

講武乘時令戈父訓甲兵雲梢催後騎天畢引前旌
華甸軍容整新林羽衛行岐陽嚴示禮莫使廢春耕

柳條邊望月

雨過高天霽晚虹關山迢遞月明中春風寂寂吹楊柳
搖曳寒光度遠空

望祀長白山

名山鍾靈秀二水發真源翠靄籠天窟紅雲擁地根千
秋佳兆啟一代典儀尊翹首瞻晴昊宮堯逼帝閭

松花江放船歌

松花江江水清夜來雨過春濤生浪水疊錦繡縠明綵
帆畫鷁隨風輕簫韶小奏中流鳴蒼巖翠壁兩岸橫浮
雲耀日何晶晶乘流直下蛟龍驚連檣接艦屯江城貔
貅健甲皆銳精旌旄映水翻朱纓我來問俗非觀兵松
花江江水平浩浩瀚瀚衝波行雲霞萬里開澄泓

江中雨望

烟雨連江勢最奇
漫天霧黑影迷離
掀翻波浪三千尺
疑是蛟龍出沒時

輕葉赫廢城

斷壘生新草
空城尚野花
翠華今日幸
谷口動鳴笳

鐵嶺

雨餘塞草自綠
日出山花更紅
轍迹神州近
遠驥鳴廣陌西東

雜詠

古戍行來日落孤村坐對月明漠漠龍沙千里桓桓虎
衛三更

巡幸遼陽

肅將軒駕向遼陽暖日晴薰百草芳照野山川皆動色
掀天旌旆自生光林間蒼蘚侵人徑城上新花綴女牆
欲問襄平舊郭郭千年華表鶴飛翔

駐蹕遼陽夜深對月用唐太宗遼城望月詩原韻

夜氣澄炎景清光度海碣流雲漸稀朗繁星聚如綴蟾
殿魄初明冰輪影未缺懷古聽行漏素心良蘊結曠然
望九霄妖氛盡殄滅

廣祐寺

禪宮多歲月瑞塔積風烟翡翠苔碑暗珠璣寶相傳
龔
簷來紫鷁湧地出青蓮微雨輕埃洗茲晨興獨偏
於寺創唐

時中有自
來佛像

八千山

曉入千山路烟光織翠蘿崎嶇緣石磴宛轉歷巖阿樹
杪朱旗出藤陰玉勒過物華看亦好景色愛清和

祖槌寺

青山橫古寺羽旆陟層巔地僻茅堂小橋危石徑穿夏
條含嫩葉春色發餘妍寂寞空林午時聞鐘磬傳

龍泉寺

狹徑纔容騎香臺欲起龍懸崖千仞落斷碣百年封泉
細通幽壑庭深暗古松臨高一騁望積翠靄重重

聖祖仁皇帝東巡古今體詩

康熙三十七年

入烏拉境

蒼山岌業路綿延野燒荒原起夕烟幾點寒鴉宿枯樹
半灣流水傍行旃

松花江網魚最多頒賜從臣

松花江水深千尺捩舵移舟網親擲溜洄水急浪花翻
一手提網任所適須臾收處激頽波兩岸奔趨人絡繹
小魚沉網大魚躍紫鬣銀鱗萬千百更有巨尾壓船頭

載以牛車輪欲折水寒冰結味益佳遠笑江南誇魴鯽
徧令頒賜扈從臣幕下傳薪遞烹炙天下才俊散四方
網羅咸使登巖廊爾等觸物思比託捕魚勿謂情之常

泛松花江

源分長白波流迅支合烏江水勢雄木落霜空天氣肅
旌旄過處映飛虹

閱窩集

并序

古松林數十里蔭翳無際非亭午夜分不見日月

松林黯黯數十里罕境偏為麋鹿遊雨雪飄蕭難到地
啼烏野草自春秋

駐蹕烏拉之船廠憶壬戌春夏巡行此地每五日
一奏請

聖祖母太皇太后安今不可得矣書志慨慕

曾問

慈寧草奏箋夜張銀燭大江邊重來往事俄追憶轉眼光

陰十七年

烏拉山嶼間古木灌莽澤潦徧野即黃龍府之地
也今人未暇詳考賦詩二首

層岡翳蒼亂高低駿馬迎風不住嘶磧裏草深行潦濶
遲回應惜錦障泥

其二

路轉山環雜古柯覆茅苫舍傍坡陀疆隅湮沒遼金界
虎穴鷹巢處處多

行圍所經輝發葉赫哈達諸地皆我

祖宗之所開并遺跡存馬賦詩二首

鐵馬金戈百戰時戎衣辛苦首開基
榻邊鼾睡聲先定始布中原一着棋

其二

垣墉遺跡尚山坳畧地平城闢土茅
盪滌塵沙真不易仰思遺烈駐雲旂

興京

霸霸興王地風雲莫可攀
滌洄千曲水盤疊百重山瞻

拜

陵園肅凝思大業艱龍蔥松柏茂瑞鳥滿林間

駐蹕奉天府

四海為家日鳴鑾過舊京新豐安可並若水事堪并城
市風猶古絃歌化漸行巍巍城闕在往歲幾經營

渡遼河

雪霽寒光已合冰雁行飛處曉天澄初冬欲盡歸程疾
回首烟光望

二陵

廣寧道中

漠漠寒雲色戍樓終日閒
饑鳥號曉月路出十三山

所過松山杏山大凌河皆

聖祖用武之地有述

松杏山頭野草黃朔風淒緊下前岡
雲屯虎旅新行在地著龍興古戰場
壘尋來餘氣色田疇耕處拾刀鎗
恢弘

聖緒存遺跡東海洋洋

祖德長

賜寧古塔將軍巴海

并序

鎮守寧古塔等處將軍巴海豐沛舊臣疆場重寄宣威
布德招徠遠人朕甚嘉焉爰賜篇章以旌乃績

夙簡威名將畧雄高牙坐鎮海雲東旌麾到處銷兵氣
壁壘開時壯武功盡使版圖歸化日遠教邇徼被皇風
酬勲世錫丹書重勉爾長思報國忠

欽定盛京通志卷五